



Uunga siunnersuut: Pisortat Pisiortortarneranni Neqerooruteqartitsinermi Maalaaruteqartarfik pillugu Inatsisartut inatsisaat nr. xx, xx. xxx 2018-imeersoq

(Inuussutissarsiornermut Nukissiuuteqarnermullu Naalakkersuisoq)

Siullermeerneqarnera

Una siunnersuut immikkoortoq 23-mut maani inersuarimi ippassaq suliarisatsinnut attuumassuteqarluinnarpoq. Siunertaavoq neqerooruteqartarnermut maalaaruteqartarfiup neqerooruteqartarnermut aalajangersakkanik unioqqutitsisoqarsimatillugu naammagittaalliutinik suliaqartalernissaa.

Ullumikkut pisortat oqartussaaffigisaanni suliffeqarfiinilu nioqqutissanik kiffartuussinernillu pisinermut tunngatillugu naammagittaaliutit inatsisitigut aalajangersarneqarnikuunngillat. Siunnersuummi ullumikkut oqaluuserisassatsinni annermik neqerooruteqartitsinermut inatsit taamatullu danskit maalaaruteqartarfiat isumassarsiorfingeqarnikuupput.

Demokraatiniit isumaqarpugut avataanut isumassarsiorarneq ajunngitsuusoq taamaakkaluartorli oqaatigerusupparput inatsisit isumassarsiorfigisartakkagut piviusorsioruussammata Kalaallit Nunatsinnullu inuiaqatigiinnullu tulluusarneqartarnissaat pingaartilluinnarparput. Arlaleriarluta takunikuupput inatsisit nunanit allanit aasagut imaluunniit isumassarsiorfigisagut uagutsinnut, inuiaqatigiinnut, nunatsinnullu tulluusarneqarsimanningsut. Taamaattumik mianersoqqussutigissavarput tamanna mianersuuttuartassagatsigu, puigunngisaannarlugulu inuiaqatigiinnut naleqqussaasarnissarput.

Nuannersuali uaniippoq tusarniaanermut atatillugu akissutini innersuussutigineqarsimasorpassuit malinneqarsimanagerat. Nuannaarutissaavoq, ippassartuulli apererusuppunga, una inatsisissaq aamma Namminersorlutik oqartussat suliffeqarfiutaani atuuttussaammat, sooq tusarniaanermi toqqaannaq allatuulli tusarniaavigineqarsimannginginnerat? Isumaqarpunga tusarniaanerni isumannaagassaqartusi, taakkuummatami ulluinnarni inatsimmik atuisussat malittarinnittussat.

Siunnersuut Inuutissarsiornermut Ataatsimiititaliamut innersuupparput kaammattuutigalugulu siunnersuut immikkoortoq 23 qissimillattaarlugu suliarineqassasoq.